



IZVJEŠTAJ

O FINANSIJSKOJ REVIZIJI AGENCIJE ZA STATISTIKU BOSNE I HERCEGOVINE ZA 2011. GODINU

Broj: 01-02/03-08-16-1-456 /12

Sarajevo, juni 2012. godine



SADRŽAJ

I MIŠLJENJE REVIZORA.....	3
II NALAZI I PREPORUKE	5
1. Uvod.....	5
2. Postupanje po ranijim preporukama.....	5
3. Sistem internih kontrola	6
4. Budžet.....	7
5. Finansijski izvještaji.....	8
6. Pregled rashoda budžeta	8
6.1. Tekući izdaci	8
7. Bilans stanja.....	11
8. Javne nabavke	11
9. Prihodi.....	11
10. Donacije	11
11. Korespondencija	12
III PRILOG	13
FINANSIJSKI IZVJEŠTAJI I IZJAVA O ODGOVORNOSTIMA	13
Izjava o odgovornostima rukovodstva	
Pregled rashoda budžeta za 2011. godinu	
Bilans stanja na 31.12.2011. godine	

I MIŠLJENJE REVIZORA

Uvod

Izvršili smo reviziju finansijskih izvještaja i usklađenosti poslovanja sa odgovarajućim zakonima i propisima za godinu koja se završava 31. decembra 2011. godine u **Agenciji za statistiku Bosne i Hercegovine** (u daljem tekstu: Agencija).

Odgovornost rukovodstva

Rukovodstvo Agencije je odgovorno za pripremu i fer prezentaciju finansijskih izvještaja u skladu sa prihvaćenim okvirom finansijskog izvještavanja, tj. Zakonom o finansiranju institucija BiH, Pravilnikom o finansijskom izvještavanju institucija BiH i Pravilnikom o računovodstvu budžeta institucija BiH. Ova odgovornost uključuje i kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja koji ne sadrže značajne pogrešne iskaze usljed prevare ili greške.

Pored odgovornosti za pripremu i prezentaciju finansijskih izvještaja, rukovodstvo Agencije je također odgovorno da osigura da su finansijske transakcije i informacije koje su prikazane u finansijskim izvještajima usklađene sa odgovarajućim zakonima.

Odgovornost revizora

Naša je odgovornost da izrazimo mišljenje o finansijskim izvještajima na osnovu revizije. Reviziju smo izvršili u skladu sa Zakonom o reviziji institucija Bosne i Hercegovine (Službeni glasnik BiH, broj 12/06) i Međunarodnim standardima vrhovnih revizionih institucija (ISSAI). Ovi standardi zahtijevaju da postupamo u skladu sa etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže značajne pogrešne iskaze. Revizija uključuje obavljanje postupaka u cilju pribavljanja revizionih dokaza o iznosima i objavama u finansijskim izvještajima. Izbor postupka je zasnovan na prosuđivanju revizora, uključujući procjenu rizika značajnog pogrešnog prikazivanja u finansijskim izvještajima usljed prevare ili greške. Prilikom procjene rizika revizor razmatra interne kontrole koje su relevantne za pripremu i fer prezentaciju finansijskih izvještaja u cilju osmišljavanja revizionih postupaka koji su odgovarajući u datim okolnostima, ali ne u svrhu izražavanja mišljenja o efikasnosti internih kontrola. Revizija također ocjenjuje finansijsko upravljanje, funkciju interne revizije i sistem internih kontrola.

Pored odgovornosti za izražavanje mišljenja o finansijskim izvještajima, naša odgovornost je izražavanje mišljenja o tome da li su finansijske transakcije i informacije koje su prikazane u finansijskim izvještajima, po svim bitnim pitanjima, usklađene sa odgovarajućim zakonima. Ova odgovornost uključuje obavljanje procedura kako bi dobili revizione dokaze o tome da li se sredstva koriste za odgovarajuće namjene koje su određene zakonom. Ove procedure uključuju procjenu rizika od značajnih neslaganja sa zakonima.

Vjerujemo da su pribavljeni revizioni dokazi dovoljni i odgovarajući i da osiguravaju osnovu za naše mišljenje.



Mišljenje

Prema našem mišljenju, finansijski izvještaji Agencije prikazuju fer i istinito, po svim bitnim pitanjima, stanje imovine i obaveza na 31. decembra 2011. godine i rezultate poslovanja i izvršenja budžeta za godinu koja se završila na navedeni datum u skladu sa prihvaćenim okvirom finansijskog izvještavanja.

Finansijske transakcije i informacije prikazane u finansijskim izvještajima bile su u svim značajnim aspektima usklađene sa odgovarajućim zakonima i propisima.

Sarajevo, 20.06.2012. godine

GENERALNO REVIZOR

Milenko Šego

**ZAMJENIK
GENERALNOG REVIZORA**

Dževad Nekić

**ZAMJENICA
GENERALNOG REVIZORA**

Božana Trninić

II NALAZI I PREPORUKE

1. Uvod

Agencija je osnovana u skladu sa Zakonom o statistici Bosne i Hercegovine¹. Sjedište Agencije je u Sarajevu, a uspostavljena je podružnica u Brčko distriktu BiH. Agencija je tijelo nadležno za obradu, distribuciju i utvrđivanje statističkih podataka Bosne i Hercegovine. Ovlasti Agencije su sljedeće:

- međunarodno predstavljanje i saradnja s organizacijama i ostalim organima,
- uspostavljanje i održavanje kontakta s donatorima i predlaganje raspodjele donacija,
- utvrđivanje statističkih standarda,
- utvrđivanje standarda koji se primjenjuju u statističkim aktivnostima državnih organa,
- prikupljanje, obrađivanje i distribuiranje statističkih podataka BiH,
- zahtijevanje od entitetskih zavoda da osiguraju podatke na nivou pojedinačnih statističkih jedinica,
- distribucija statističkih podataka BiH svim korisnicima,
- podsticanje saradnje između entitetskih zavoda i osiguranje redovne razmjene podataka,
- koordiniranje, planiranje, vođenje i objavljivanje rezultata popisa stanovništva i domaćinstava BiH,
- praćenje primjene i korištenja usvojenih standarda i izvještavanje o stepenu poštivanja standarda u godišnjem izvještaju Agencije.

Zakonom o statistici BiH osnovano je i Vijeće za statistiku koje po službenoj dužnosti sačinjavaju: direktor Agencije i njegovi zamjenici, direktori entitetskih zavoda za statistiku, šef Podružnice Brčko, guverner Centralne banke BiH i ministar finansija i trezora BiH. Vijeće za statistiku također sačinjavaju tri člana iz reda davalaca i korisnika podataka koji su priznati radnici u područjima statistike, ekonomskih nauka, odnosno biznisa. Ova tri člana imenuje Vijeće ministara BiH. Vijeće daje preporuke Agenciji u vezi s nacrtom programa i plana rada i daje mišljenja o istim, prati rad Agencije i daje preporuke Vijeću ministara BiH o sredstvima koja su Agenciji neophodna za ispunjavanje zadaća iz plana rada i programa, te pomaže saradnju između nadležnih organa u cilju postizanja najviše moguće kvalitete statistike koji zadovoljava potrebe korisnika na svim nivoima.

Odgovorna lica Agencije su direktor i dva zamjenika direktora koje je Agencija za državnu službu BiH imenovala 18.11.2009. godine na period od četiri godine.

2. Postupanje po ranijim preporukama

Ured za reviziju institucija BiH (u daljem tekstu: Ured za reviziju) izvršio je finansijsku reviziju Agencije za 2010. godinu o čemu je sačinjen Izvještaj o reviziji, te izrazio pozitivno mišljenje na finansijske izvještaje Agencije i zakonitost poslovanja.

¹ Službeni glasnik BiH broj: 26/04 i 42/04

Agenciji su predložene preporuke kojima se sugerira preduzimanje određenih aktivnosti na unaprjeđenju poslovanja i otklanjanju nepravilnosti u daljem poslovanju. Agencija nije dostavila odgovor Uredu za reviziju u skladu s članom 16. stav 3. Zakona o reviziji institucija BiH.

Osvrtom na preporuke revizije date u Izvještaju o reviziji za 2010. godinu, te uvidom u preduzete aktivnosti, utvrdili smo sljedeće:

Preporuke čija je realizacija u toku:

- Agencija je u zaključenim ugovorima precizno definisala uslove plaćanja ali i dalje postoji mogućnost unaprjeđenja procesa javnih nabavki u smislu dodatne transparentnosti (vidi tačku 8. Izvještaja - Javne nabavke)

Nismo u mogućnosti dati ocjenu realizacije preporuke vezano za planiranje budžeta obzirom na specifične uslove poslovanja u 2011. godini koji proističu iz odluka o privremenom finansiranju institucija BiH.

3. Sistem internih kontrola ²

Agencija je odgovorna za kreiranje, primjenu i održavanje internih kontrola koje su relevantne za pripremu i prezentaciju finansijskih izvještaja i usaglašenost poslovanja sa zakonima i propisima.

Konstatirano je kao sistem internih kontrola u Agenciji funkcioniра na zadovoljavajućem nivou. U nedostatku jedinstvenih pravila koja regulišu određene oblasti potrošnje, a koja su u nadležnosti Vijeća ministara BiH, Agencija je donijela veći broj internih akata kojima su ista regulisana i kojima su definisani nivoi ovlaštenja i odgovornosti rukovodstva i osoblja Agencije. Agencija je donijela Pravilnik o internoj kontroli i reviziji i procedure za primjenu navedenog pravilnika. Na osnovu Pravilnika o internoj kontroli i reviziji Agencije, u toku 2011. godine, u dva navrata izvršene su interne kontrole poslovanja Agencije.

Pravilnikom o unutrašnjoj organizaciji Agencije, za obavljanje poslova iz nadležnosti Agencije sistematizovana su ukupno 192 izvršioca. Sa 31.12.2011. godine u Agenciji su bila popunjena ukupno 93 radna mjesta. Zbog privremenog finansiranja institucija BiH u 2011. godini, Agencija nije ispunila plan prijema novih zaposlenika potrebnih za realizaciju međunarodnih projekata i provođenja popisa stanovništva.

Agencija nema uspostavljenu funkciju interne revizije, s obzirom da u skladu sa Zakonom o internoj reviziji³ ne udovoljava kriterijima za uspostavu odjela za internu reviziju. Stoga će se ova funkcija vršiti putem Ministarstva finansija i trezora BiH.

² Sistem internih kontrola je jedinstven proces kojeg uvodi rukovodstvo i zaposleni institucije, a osmišljen je za pružanje razumnog uvjerenja da se u izvršavanju misije institucije postižu sljedeći opći ciljevi: efikasne poslovne operacije, pouzdano finansijsko izvještavanje, usklađenost poslovanja sa zakonima i propisima i zaštita imovine.

³ Službeni glasnik BiH, broj 27/08

4. Budžet

- **Planiranje i izvršenje budžeta**

Agencija je uputila zahtjev Ministarstvu finansija i trezora BiH za dodjelu sredstava iz budžeta za 2011. godinu u ukupnom iznosu od 4.692.114 KM (tekući izdaci 4.608.046 KM i kapitalni izdaci 84.068 KM). Međutim, zbog neusaglašenih stavova u svezi usvajanja budžeta tokom cijele 2011. godine, ovaj zahtjev nije razmatran, te isti nije prošao proceduru redovnog usvajanja budžeta.

Finansiranje Agencije u 2011. godini realizovano je u skladu s odlukama o privremenom finansiranju institucija BiH (četiri odluke) te Odlukom o operativnim mjerama za provođenje Odluke o privremenom finansiranju institucija BiH za period januar-mart 2011. godine. Ove odluke su predviđale kvartalno raspolaganje sredstvima u visini $\frac{1}{4}$ od iznosa usvojenog budžeta za 2010. godinu.

Ministarstvo finansija i trezora BiH je po odlukama o privremenom finansiranju, a zbog provođenja mjera štednje, od Agencije zahtijevalo umanjeње budžeta na pojedinim pozicijama, tako da je Agencija u 2011. godini u konačnici raspolagala s ukupno 3.909.500 KM.

Agenciji je prenijela sredstva iz višegodišnjih kapitalnih izdataka, vezano za projekt „Popis stanovništva, kućanstva i stanova“ u iznosu od 930.019 KM. Zbog kašnjenja s usvajanjem Zakona o popisu stanovništva, kućanstava i stanova, Agencija u 2011. godini nije vršila utrošak sredstava predviđenih za ove namjene, te je ista prenijela u narednu godinu.

Zakon o budžetu institucija BiH i međunarodnih obaveza BiH za 2011. godinu⁴ usvojen je tek po isteku fiskalne godine, odnosno u 2012. godini. Ovim Zakonom Agenciji su odobrena sredstva u visini ukupnog izvršenja na dan 10.02.2012. godine, odnosno u iznosu od 3.812.539 KM (neposredna potrošnja 3.684.661 KM, programi posebne namjene 127.878 KM).

Ukupno izvršenje budžeta Agencije za 2011. godinu iznosi 3.680.046 KM. Sredstva odobrena Zakonom o budžetu institucija BiH i međunarodnih obaveza za 2011. godinu za neposrednu potrošnju razlikuju se, odnosno veća su za 4.615 KM od ukupnog izvršenja budžeta. Razlog neslaganja usvojenog budžeta od izvršenog su naknadna knjiženja, odnosno storniranje na određenim pozicijama troškova.

Struktura odobrenog i izvršenog budžeta po vrsti rashoda prikazana je u prilogu Izvještaja, u Tabeli I – Pregled rashoda iz budžeta za 2011. godinu.

Agencija je izvršila jedno prestrukturisanje rashoda u 2011. godini u okviru ukupnog iznosa raspoloživih sredstava, na način da je umanjena pozicija naknada troškova zaposlenih za 21.000 KM, a za isti iznos je uvećana pozicija troškova zakupa.

⁴ Službeni glasnik BiH, broj 12/12 od 14.02.2012. godine

- **Planirani i realizirani programski zadaci**

Plan rada Agencije za 2011. godinu pripremljen je na osnovu Zakona o statistici BiH, Statističkog programa Bosne i Hercegovine za period 2009-2012, Razvojne strategije BiH 2008-2013, Strategije integracije BiH u Evropsku uniju, Compendiuma statističkih i drugih regulativa i preporuka EU-a i UN-a. Vijeće ministara BiH je isti usvojilo na sjednici održanoj 01.06.2011. godine.

Izveštaj o radu Agencije za 2011. godinu dostavljen je 20.03.2012. godine na razmatranje Vijeću ministara BiH, koje do završetka procesa revizije (maj 2012. godine) nije bilo usvojeno. U 2011. godini Agencija je, u saradnji s entitetskim zavodima za statistiku, provela 149 statističkih istraživanja i aktivnosti, te publikovala 12 tematskih publikacija i 200 saopćenja. Tokom 2011. godine Agencija je nastavila rad na pretpripremama za popis stanovništva.

Pored problema koje je prouzrokovalo neusvajanje Zakona o popisu stanovništva, domaćinstava i stanova, u Agenciji je prisutan i problem po pitanju osiguranja traženih podataka vezanih za podatke neophodne za statistiku vanjske trgovine, tj. nedostavljanje podataka s jedinstvenim identifikacionim brojem kompanija od strane Uprave za indirektno oporezivanje BiH. Nadalje, uprkos potpisanom Sporazumu s Upravom za indirektno oporezivanje BiH o dostavi podataka iz PDV prijave poreznih obaveznika, ovi podaci nisu dostavljani Agenciji niti u 2011. godini.

5. Finansijski izvještaji

Agencija je, u skladu sa Pravilnikom o finansijskom izvještavanju institucija BiH⁵ sačinila godišnji finansijski izvještaj za 2011. godinu koje sadrži bilans stanja, pregled rashoda budžeta po ekonomskim kategorijama, posebne podatke o plaćama i broju zaposlenih, pregled dinamike zapošljavanja, pregled stalnih sredstava u obliku stvari i prava, pregled prihoda, primitaka i finansiranja i pregled kapitalnih ulaganja po vrstama, projektima i opremi. Također, sastavni dio godišnjeg finansijskog izvještaja čini i obrazloženje uz izvještaj o izvršenju budžeta koje je sastavljeno u tekstualnom obliku.

Godišnji finansijski izvještaj predat je 28.02.2012. godine Ministarstvu finansija i trezora BiH.

6. Pregled rashoda budžeta

6.1. Tekući izdaci

- **Bruto plaće**

Ukupno ostvarene bruto plaće i naknade plaća iznose 2.614.247 KM. Zakonom o budžetu institucija BiH i međunarodnih obaveza BiH za 2010. godinu odobreni broj zaposlenih iznosio je 94 lica. S 31.12.2011. godine u Agenciji su bila zaposlena 93 lica.

⁵ Službeni glasnik BiH, broj 33/07 i 16/10

Obračun i isplata plaća vršena je u skladu sa Zakonom o plaćama i naknadama u institucijama BiH. Agencija u 2011. godini nije isplaćivala novčane nagrade (stimulacije) zaposlenima.

- **Naknade troškova zaposlenih**

Ukupno ostvarene naknade troškova zaposlenih s 31.12.2011.godine iznose 304.559 KM. Značajnije izdaci odnose se na naknadu za topli obrok tokom rada (155.347 KM), naknadu za prijevoz na posao i prijevoz s posla (63.823 KM) i regres za godišnji odmor (55.931 KM).

Naknade su isplaćivane prema važećim podzakonskim aktima koji regulišu način isplate istih.

- **Putni troškovi**

Ukupno ostvareni izdaci putnih troškova iznose 108.364 KM. Od toga putni troškovi u zemlji iznose 20.301 KM, a u inostranstvu 88.063 KM.

Agencije je zaključno s 31.12.2011. godine ukupno izdala 369 putnih naloga. Putovanja u zemlji pretežno su vezana za seminare, obuke putem međunarodne saradnje, kooperacije s entitetskim zavodima, a putovanja u inostranstvo vezana su za prisustvo raznim konferencijama, učešće predstavnika Agencije na međunarodnim sastancima u organizaciji Eurostata, studijske posjete iz različitih statističkih oblasti, koordinacija i implementacija raznih projekata i sl.

- **Izdaci telefonskih i poštanskih usluga**

Ukupni izdaci telefonskih i poštanskih usluga ostvareni u 2011. godini iznose 69.162 KM. Značajniji iznosi odnose se na izdatke za fiksne telefone (32.172 KM), izdatke za internet (17.049 KM) i izdatke za mobilne telefone (14.855 KM).

Pravo na korištenje mobilnih telefona u Agenciji ostvaruje 19 lica. Visina odobrenih ograničenja kreće se u rasponu od 50 KM za vozača do 400 KM za direktora Agencije.

Iako smo se uvjerali da je Agencija preduzele određene radnje na korištenju resursa „e-vlade“ (DNS zapisi za web stranicu se nalaze na serverima kod „e-vlade“), konstatovano je kako Agencija nije koristila sve ostale mogućnosti upotrebe resursa definisanih Odlukom o elektronskom poslovanju i „e-vladi“ u Vijeću ministara BiH⁶.

Naime, putem resursa „e-vlade“ svaka institucija može koristiti besplatne usluge interneta, intraneta, elektronske pošte, instalacije i administracije antivirusnog softvera, monitoringa radnih stanica i druge servise koji se budu razvijali na projektu „e-vlada“. Preduvjet za korištenje resursa sistema „e-vlade“ je da Agencija implementira link do prostorija „e-vlade“ u zgradi Vijeća ministara BiH.

⁶ Službeni glasnik BiH, broj 07/10

Sugerišemo Agenciji da razmotri i analizira i ostale mogućnost povezivanja na sistem „e-vlade“ i korištenja resursa sistema, čime bi ostvarila smanjenje troškova za sve navedene usluge, a zadržala ili popravila razinu funkcionalnosti informacionog sistema.

- **Unajmljivanje imovine i opreme**

Ukupno realizovana sredstva za unajmljivanje prostora i zgrada s 31.12.2011. godine iznose 220.288. Najveći iznos (218.240 KM) odnosi se na zakup poslovnog prostora Agencije, površine 840m² za koji ugovorena mjesečna zakupnina iznosi 17.690 KM. Režijske troškove (izuzev troškova održavanja i opravke lifta) snosi zakupac. Ostali izdaci (2.048 KM) se odnose na zakup parking prostora i opreme.

- **Izdaci za usluge prijevoza i goriva i tekućeg održavanja**

Agencija raspolaže s voznim parkom od ukupno pet vozila. Četiri vozila su na raspolaganju za potrebe sjedišta Agencije, a jedno vozilo služi za potrebe rada Podružnice Brčko distrikta. Neograničeno pravo raspolaganja vozilom ima ravnatelj. Ukupni troškovi uporabe i održavanja vozila tokom 2011. godine iznosili su 24.693 KM, od čega se značajniji izdaci odnose na izdatke za gorivo (11.571 KM), usluge i materijal za servisiranje vozila (5.693 KM), te osiguranje vozila (3.923 KM).

Izdaci za tekuće održavanje zgrada i opreme realizirani su u iznosu od 45.481 KM. Značajniji troškovi evidentirani su na održavanju zgrade (23.027 KM) i održavanju opreme (13.899 KM). Agencija je u 2011. godini ugovorila uređenje server sale. Tokom cijele godine plaćana je naknada za uslugu održavanja zgrade.

- **Ugovorene usluge**

Izdaci za ugovorene usluge ostvareni su u iznosu od 176.160 KM. Značajniji troškovi odnose se na stručne usluge (56.861 KM), usluge štampanja (40.192 KM) te ugovore o djelu (39.873 KM).

Stručne usluge: Realizacija troškova evidentiranih na kontu stručnih usluga odnosi se na plaćanje ugovorene stručne informatičke edukacije zaposlenih Agencije. Agencija je, obzirom kako su u toku pripreme za popis 2013. godine, ugovorila obuku zaposlenih iz 9 područja stručne informatičke edukacije, koju su većim dijelom pohađali zaposleni u IT sektoru.

Ugovori o djelu: Značajnija realizacija troškova (16.198 KM) izvršena je na osnovu plaćanja usluga anketara koji su angažovano za obavljanje ankete o radnoj snazi na području Brčko distrikta BiH. Anketa o radnoj snazi se provodi svake godine na cijeloj teritoriju Bosne i Hercegovine, a obzirom kako je Brčko distrikt BiH pod ingerencijom Agencije, navedeno anketiranje finansiralo se iz sredstava Agencije. Obračun naknade za anketare se vrši po podnošenju izvješća, a sukladno jasno definiranim pravilima. Pored toga Agencija je tokom čitave godine na temelju zaključenog ugovora o djelu plaćala usluge angažiranja dvije higijeničarke i jednog portira. Za te poslove isplaćena je ukupna naknada od 20.775 KM.

Usluge tiskanja: Agencija je u cilju što kvalitetnijeg izvršenja zadataka radi kojih je i utemeljena, vršila štampanje raznih publikacija u cilju približavanja neophodnih statističkih indikatora na nivou Bosne i Hercegovine krajnjim korisnicima.

7. Bilans stanja

Ukupna aktiva Agencije iznosi 701.581 KM, a sastoji se od novčanih sredstava (10.000 KM), kratkoročnih potraživanja (1.990 KM) i neotpisane vrijednosti stalnih sredstava (689.591 KM). Ukupna pasiva iznosi 1.045.660 KM, a čine je kratkoročne tekuće obaveze (115.629 KM), obaveze prema zaposlenima (240.440 KM) i izvori državnih sredstava (689.591 KM).

8. Javne nabavke

Agencija je u januaru 2011. godine donijela plan nabavki za tekuću godinu, a na temelju projekcije budžeta za 2011. godinu. Planom su definirani: predmet nabavke, vrsta postupka, vrijeme pokretanja postupka, te procijenjena vrijednost nabave.

Analizirajući postupke nabavki, konstatovano je da je Agencija u 2011. godini provela jedan otvoreni postupak, deset konkurentskih postupaka bez dodatnog objavljivanja, dva konkurentska postupka s dodatnim objavljivanjem, te veći broj direktnih sporazuma za nabavke manje vrijednosti (do 6.000 KM).

lako možemo potvrditi kako je Agencija pri izboru dobavljača na osnovu konkurentskog postupka bez dodatnog objavljivanja, zahtjev za dostavljanje ponuda upućivala na četiri i više adresa, sugerišemo da se u cilju veće transparentnosti i konkurentnosti, pri provođenju postupka konkurentskog zahtjeva za dostavu ponuda, razmotri opcija dodatne objave konkurentskog zahtjeva.

9. Prihodi

Agencija je u 2010. godini ukupno ostvarila 102.375 KM prihoda. Od tog iznosa, 100.000 KM se odnosi na uplatu Vlade Brčko distrikta BIH na osnovu Sporazuma o preuzimanju poslova, opreme, finansijskih sredstava i zaposlenih biroa za statistiku Brčko distrikta od 22.12.2005. godine.

10. Donacije

Agencija je u 2011. godini raspolagala s 222.168 KM sredstava od donacija. Za ova sredstva uspostavljeni su zasebni projektni kodovi u ISFU sistemu. Tako je vođeno šest programa posebne namjene i to: Anketa o potrošnji domaćinstva - HBS, Ažuriranje glavnog uzorka domaćinstva, CARDS 2005 Twinning project, Pilot prošireni HBS, SIDA projekti i Ostale donacije. S obzirom da je riječ o projektima koji su započeti ranijih godina, vrijednost prenesenih neutrošenih sredstava iz 2010. godine iznosi 141.450 KM, dok su ukupne uplate u 2011. godini iznosile 80.718 KM. Realizacija troškova po projektima vršena je sukladno zahtjevima donatora. Značajniji dio



realizacije troškova odnosi se na ugovorene usluge – ugovore o djelu i usluge štampanja, te putne troškove. Po okončanju definisanih zadataka Agencija uredno sačinjava izvještaje i iste prezentuje donatoru. Projekat „CARDS 2005 Twining“ je okončan krajem 2011. godine, a za ostalih pet projekata neutrošena sredstva u ukupnom iznosu od 89.879 KM prenesena su u 2012. godinu.

11. Korespondencija

Agencija je u ostavljenom roku dostavila komentare na Nacrt izvještaja o reviziji za 2011. godinu u kojima nije bilo primjedbi na iznesene nalaze i preporuke.

Vođa tima za finansijsku reviziju

Danijel Jozić, viši revizor

U reviziji učestvovali:

Nataša Pavlović, revizor

Osman Paćuka, revizor

Rukovodilac Odjela za finansijsku reviziju

Munevera Baftić, viši revizor

Rukovodilac Odjela za razvoj, metodologiju i kontrolu kvalitete revizije

Dragoljub Kovinčić, viši revizor



III PRILOG

FINANSIJSKI IZVJEŠTAJI I IZJAVA O ODGOVORNOSTIMA

Izjava o odgovornostima rukovodstva

Međunarodni standard vrhovnih revizionih institucija (ISSAI 1580) predviđa da revizor treba da dobije odgovarajuću izjavu od rukovodstva institucije kao dokaz da rukovodstvo priznaje svoju odgovornost za objektivno prikazivanje finansijskih izvještaja saglasno mjerodavnom okviru finansijskog izvještavanja, te da je odobrilo finansijske izvještaje.

Rukovodstvo **Agencije za statistiku Bosne i Hercegovine** (u daljem tekstu: Agencija) dužno je da osigura da finansijski izvještaji za 2011. godinu budu izrađeni u skladu sa Zakonom o finansiranju institucija BiH (Službeni glasnik BiH broj 61/04 i 49/09), Pravilnikom o finansijskom izvještavanju institucija BiH (Službeni glasnik BiH broj 33/07) i Pravilnikom o računovodstvu budžeta institucija BiH (Protokol Ministarstva finansija i trezora BiH broj 01-St4-16-1810/05 od 30.05.2005. godine). Rukovodstvo je također obavezno da postupa u skladu sa Zakonom o budžetu institucija BiH i međunarodnih obaveza BiH za 2011. godinu (Službeni glasnik BiH broj 12/12) i pratećim uputstvima, objašnjenjima i smjernicama koje donosi Ministarstvo finansija i trezora BiH, kao i ostalim zakonima u Bosni i Hercegovini, tako da finansijski izvještaji daju fer i istinit prikaz finansijskog stanja i rezultate poslovanja Agencije.

Pri sastavljanju takvih finansijskih izvještaja odgovornosti rukovodstva obuhvataju garancije:

- da je osmišljen i da se primjenjuje i održava sistem internih kontrola koji je relevantan za pripremu i fer prezentaciju finansijskih izvještaja;
- da finansijski izvještaji ne sadrže materijalno značajne pogrešne iskaze;
- da finansijski izvještaji sadrže sve relevantne podatke i analize izvršenja budžeta, kao i podatke o sistemu internih kontrola i realizaciji preporuka revizije.
- da se u poslovanju primjenjuju važeći zakonski i drugi relevantni propisi;

Rukovodstvo je također odgovorno za čuvanje imovine i resursa od gubitaka, pa stoga i za preduzimanje odgovarajućih mjera da bi se spriječile i otkrile pronevjere i ostale nezakonitosti.

Datum, 21.05.2012.

Direktor:

Zdenko Milinović

Pregled rashoda iz budžeta za 2011. godinu

Naziv institucije: Agencija za statistiku BiH

Tabela I

Opis	Odobreni budžet	Usklađivanja budžeta	Ukupni budžet (2+3)	Izvršenje prorčuna	Index 5/4
1	2	3	4	5	6
1. Tekući izdaci	3.684.661	0	3.684.661	3.680.046	100
Bruto plaće i naknade	2.614.247		2.614.247	2.614.247	100
Naknade troškova zaposlenih	326.145	-21.000	305.145	304.559	100
Putni troškovi	110.133		110.133	108.364	98
Izdaci telefonskih i pošt.usluga	70.795		70.795	69.162	98
Izdaci za energiju i kom. usluge	53.795		53.795	53.173	99
Nabavka materijala	63.031		63.031	63.030	100
Izdaci za usl. prijevoza i goriva	14.534		14.534	14.534	100
Unajmljivanje imovine i opreme	199.289	21.000	220.289	220.288	100
Izdaci za tekuće održavanje	52.238		52.238	52.237	100
Izdaci za osiguranje	4.293		4.293	4.292	100
Ugovorene usluge i druge usluge	176.161		176.161	176.160	100

2. Kapitalni izdaci	0	0	0	0	
Nabavka zemljišta			0		
Nabavka građevina			0		
Nabavka opreme			0		
Nabavka ostalih stalnih sreds.			0		
Rekonstrukcija i inves.održ.			0		

3. Tekući grantovi	0	0	0	0	
			0		
			0		

I Ukupno (1+2+3)	3.684.661	0	3.812.539	3.809.007	100
II Prosječan broj zaposlenih				93	

4. Novčane donacije			127.878	128.961	101
Prošireni HBS			51.342	51.342	100
Anketa HBS			1.207	1.208	100
Ostale donacije			54.033	55.115	102
Ažuriranje glavnog uzorka domaćinstava			10.629	10.629	100
CARDS 2005			153	153	100
SIDA projekti			10.514	10.514	100

Rukovodstvo je ove izvještaje odobrilo 28.02.2012. godine.

Direktor:

Zdenko Milinović

Bilans stanja na 31.12.2011. godine

Naziv institucije: Agencija za statistiku BiH

Tabela II

Opis	31.12.2010	31.12.2011.	Indeks 3/2
1	2	3	4
1. Gotovina, krat.potraživanja, razgraničenja i zalihe	359	11.990	3.340
Novčana sredstva		10.000	
Kratkoročna potraživanja	359	1.990	554
Kratkoročni plasmani			
Interni finansijski odnosi			
Zalihe			
Kratkoročna razgraničenja			
2. Stalna sredstva	889.593	689.591	78
Stalna sredstva	1.460.486	1.482.464	102
Ispravka vrijednosti	570.893	792.873	139
Neotpisana vrijednost stalnih sredstava			
Dugoročni plasmani			
Dugoročna razgraničenja			
UKUPNO AKTIVA (1+2)	889.952	701.581	79

3. Kratkoročne obaveze i razgraničenja	713.667	356.069	50
Kratkoročne tekuće obaveze	474.842	115.629	24
Kratkoročni krediti i zajmovi			
Obaveze prema zaposlenima	238.825	240.440	101
Interni finansijski odnosi			
Kratkoročna razgraničenja			
4. Dugoročne obaveze i razgraničenja	0	0	
Dugoročni krediti i zajmovi			
Ostale dugoročne obaveze			
Dugoročna razgraničenja			
5. Izvori sredstava	889.593	689.591	78
Izvori sredstava	889.593	689.591	78
Ostali izvori sredstava			
Neraspoređeni višak prihoda/rashoda			

UKUPNO PASIVA (3+4+5)	1.603.260	1.045.660	65
------------------------------	------------------	------------------	-----------

Napomena: Pravilnikom o finansijskom izvještavanju institucija Bosne i Hercegovine, čl.8. stav 4., napomenuto je da bilans stanja budžetskih korisnika **neće biti uravnotežen** (aktiva jednaka pasivi) zbog programski uspostavljenog sistema Glavne knjige, dok će bilans stanja koji radi Ministarstvo finansija i trezora na nivou budžeta institucija Bosne i Hercegovine za tekuću godinu biti uravnotežen.

Rukovodstvo je ove izvještaje odobrilo 28.02.2012. godine

Direktor:

Zdenko Milinović